

Biografía di Reynaldo Rafael Lampe (Rey)

Reynaldo Rafael Lampe a nace na Aruba dia 17 di februari 1943. Reynaldo no tin number artistico, simplemente desde chikito nan a yam'e Rey. Number di su tata ta Basilio Lampe y su mama ta Magda Croes. Rey a nace na Barcadera cu tabata e tempo ey, parti di e barío di Santa Cruz. Nan ta cinco ruman, tres ruman homber y dos ruman muhe. Rey ta di cuatro ruman. Number di su casa ta Carmen Chiquito. E ta naci dia 12 di februari 1946. Nan a casa dia 10 di juli 1971 y nan tin tres yiu: Carreyna naci dia 20 di april 1977, Arnalda cu fecha di nacemento 5 di mei 1978 y Romelia dia 13 di maart 1981. Tin mas musico den famia. Pero den cas mes, Rey su yiunan ta balia hopi den grupo p'aki p'aya.



Segun Rey e bida artistico no ta un cambio den bida, ta mescos na cas cu su hendenan.

E bida artistico no a trece cambio den bida na cas cu su hendenan, cu su rumannan ni cu su famianan. Nan relacion familiar a keda mescos. Musica tambe ta haci bo sinti yega na esnan cu bo ta bay canta pa nan, cu ta scucha bo y nan ta aplaudi bo. Esey ta un satisfaccion cu bo ta haya y mesora bo ta sinti bo relaha, alegre y e parti social ta masha agradabel mes.

E bida artistico

Rey ta kere desde cu e tabatin seis aña, nan tabata bay cu frecuencia na su madushi y padushi. Ta ey, su omonan tabata toca nan piesanan crioyo cu instrumentonan musical manera piano, mandolin, guitarra, tambora, cuatro, maraca, raspa etc. Asina e tambe ta participa hunto cu nan. Rey ta kere cu di biaha musica a cuminsa interesa e memorianan hoben. E tabata forma parti di koor immaculada di Sta. Cruz. Nan tabata canta den misa cu combinacion di cuatro bos. Nan ta bin hunto cu otro integrantes di e coro cu tabata sa algo di musica. Asina nan a bin forma un trio cu tabata yama

“Los Virreyes”. Tabata Frank Croes, Nico Lampe, ruman di Rey y Rey mes. Nan tabata relativamente hopi jong. Rey ta kere diesseis pa diesshete aña cu bo por a bay canta pa un hacimento di aña, of den un show musical. Nan a toca varios aña basta activo, despues Frank mester a bay Hulanda y nan a keda como miembro di koor. Nan a haya como integrantenan, Hyacintho (Chinto) Geerman y Roly Werleman y hunto cu Rey nan a dicide di forma un trio musical. Chinto tabata toca riba requinto, Roly cu guitarra y Rey mes, guitarra e no a toca e

tempo ey ainda sino maraca despues guitarra. E tabata sa mas o menos kico pa haci. E ora cu e trio, nan a forma Los Arubeños. E nomber Los Arubeños a bin dor cu frecuentemente nan tabata bay Colombia pa bishita y consulta medico, na Colombia nan ta yama nos Arubianonan “Arubeños”. Asina nan a pone e nomber Los Arubeños na aña 1965. Nan a keda ensaya, te cu nan a bay den un show musical na Cer'i Noka, un actividad organisa pa Parochieraad. Hopi hende tabata paga entrada pa crea fondo pa asina cubri cierto gastonan di Parochieraad. Varios biaha tabatin sorto di shownan asina den un

Dedicacion y estilo musical

En principio Rey su prome instrumento cu e tabata toca, ta mandolin. El a train cu Trio Los Vireyes y ta cu mandolin Rey a cuminsa prome cu un omo di dje. E mandolin ey tin un estilo masha bunita, tur dorna p'aki p'aya. Rey kier sa e ta di e marca Marma. E omo a must'r'e kico ta kico. E dedicacion na tecnicanan ta existi ehercicio di dos of tres bes pa siman. Bo ta busca combinacion di escala riba e guitarra, cu ta parti abou y parti ariba,

pesey bo tin tanto nota musical, nan ta bisa, notanan traha acerca. Anto Rey a cuminsa saca piesa riba e mandolin. Despues, e omo mes a bende Rey un mandolin. E ta kere e tempo ey, e tabatin diescuatro of diescinco aña. Nan a bay cu e trio y nan a toca den show na diferente caminda. Estilo cu e trio ta toca ta bolero, tumba, mazurka, wals y ranchera. Pues, nan ta bin cu diferente ritmo y nan a canta den diferente idioma.



Desaroyo musical



Rey tabata hopi activo tanto cu Los Virreyes cu tabata e grupo tipico, tambe cu Mariachi Universo, actualmente e ta cu Rondalla Universo di Aruba. Esaki ta e gruponan cu Rey tabata dedica mas tempo na nan. Y den bes en cuando un hende ta pidie pa e bay toca pa un hacimento di aña tal caminda y

e ta pasa man pa su guitarra y ta complace cu mucho gusto y cu amor nan ta toca nan piesanan. Pero fuera di esey, nan tabata tin un grupo tipico, den cua Rey tabata toca fio, pero despues nan a haya Chinto mes kende ta parti di e trio y tambe ta violinista. E ora Chinto a tuma e fio over, nan a pasa paranda di Dande na e famianan pa toca cancionnan tipico. Despues cu e trio a haci un aña di existencia, Catey Fortunato Werleman a uni su mes na e trio na aña 1966 y a keda te awor. Despues di algun aña, ora Chinto Geerman a sali, nan a haya algun integrante mas cu a yuda nan. Por ehempel Ricardo Arends a bin yuda pa mantene e trio,

nan a reemplasa Trio Huasteca, cu tabata un bon trio tambe na Concorde Hotel, durante dos siman cu Huasteca mester a bay afo. Despues cu Frank Croes a bin di Hulanda, e tambe tabata un reemplasante, ora cu un tocado no por presenta. Ultimo ta Mario Croes a join nan, pero aparte di esey, nan tabata forma parti di Mariachi Universo tambe.



Nan tabata cu nan grupo, bunita uniforme, canta nan cancionnan ranchera pa hacimento di aña. Fuera di esey, nan ta parti di un Rondalla actual di diesdos guitarista y nan ta train practicamente tur siman. Rondalla ta toca na diferente actividad, manera durante naturalisacion na Aruba, dia di Himno y Bandera, dia di Betico, fiestanan priva, temporada di Pasco, shownan, na TeleAruba, den clubnan, etc.

E parti internacional

Nan a representa Aruba varios biaha cu nan musica, den convencionnan cu ta promove Aruba. Fuera di Corsou, nan a toca den show di trio cu Los Arubeños. Fuera di Los Arubeños, e grupo tipico tambe a bay Mexico y nan a toca tanto cu trio y cu grupo tipico. Nan a toca den un show hunto cu otro mariachinan na Mexico. Nan a bay Alemania (West Berlin), na Puerto Rico riba e Ferry Almirante Luis Brion. Tambe nan a yega di toca riba crucero pa e cena di gala di e patron di e cuerpo cu ta maneha e crucero ey. Tur loke nan mester a haci riba e barco ta toca, anto e salida tabata for di Corsou. Na St. Kitts nan a baha.

Tambe nan a toca na partinan di Merca, manera New York, Philadelphia, Brooklin, Boston y na mayoria estado ey banda. Na Alemania, nan a haya e invitacion en combinacion cu tur e gruponan cu tabatin aya. Tabata 120 pais cu a participa riba e tereno musical. Trio Los Arubeños tabata un di e cinconan selecta pa bay toca na canal dos di television di West Berlin e tempo aya. E trio a haci tambe un presentacion hopi exitoso durante un cena di gala na e Rey Abu Dhaby di Saudi Arabia. Nan a pasa hopi bon riba e tereno musical. Te ainda tur cos ta bay bon, nan ta conforme, feliz y contento cu nan trio ta activo ainda.



Grabacionnan realisa

Nan a graba un cd-nan tambe, entre otro na Papiamento y asina un motibo pa laga un recuerdo pa hubentud cu ta biniendo aworaki den estilo di musica di guitarra y canto. Ta parece como si fuera e tipo di musica aki a keda un banda. P'esey, nan cu te ainda kier sigui y stimula e muchanan hoben ainda pa asina nan tambe por bin cu algo similar, esta canto, musica cu tres guitarra y combinacion di tres bos. Nan ta contento di por ta activo den e direccion ey te ainda. E trio a bay graba na radio Kelkboom cu tabata situa den Emmastraat. Nan a graba na Tele Aruba, tambe nan a yega di graba cu Pati Lacle den Klompen Club di Aruba Caribbean Hotel. Asina Trio Arubeños a graba varios "disco 45" y grabacionnan despues a sigui tambe cu Hildward Croes d.f.m.



Den Cristal Sound Factory hunto cu Hildward Croes (d.f.m.) ingeniero di Studio.



Acontecimiento cu Rey a considera mas importante den e bida artistico

Rey ta kere cu e acontecimentonan actual ta basa riba musico y cantantenan ageno, di otro paisnan di otro nacion, esta imigrante cu ta bin establece na Aruba. No tin ningun fundacion active awor aki riba tereno musical pa e gruponan, pa proteha loke ta di Aruba riba tereno menciona, of riba cualkier otro tereno cultural di Aruba. Anto e ora unda pa bay, Rey tabata parti di entre otro fundacion manera Adayma, despues Asoma. Ultimo tin uno cu yama MUSICA tambe. Sinembargo ta sinti falta di e parti cu nan por defende e gruponan e agrupacionnan di Aruba, pa mantene nos cultura y pa proteha e obranan musical di e compositornan, areglista y tur musiconan Arubano.

Sugerencia pa futuro generacion

Ohala e scolnan por bin cu lesnan musical of posibilidad pa duna cursonan musical den por ehempel estilo crioyo, estilo profesional pa asina involucra e hobennan desde awo caba riba e tereno musical. Conhuntamente cu Scol di musica Rufo Wever, por dedica hopi tempo na educacion musical y cu nan por mira bek e inversion cu ta wordo haci tanto den instrumento, den orario, den pagamento di cursonan. E mayornan lo mester ta mas conciente pa dedica nan tempo pa hiba e muchanan les, hiba nan den gruponan di canto, baile di shownan di mucha, shownan di hende grandi. Wak si nan por mira e beneficianan den futuro cu nan por haya un trabou p.e. anto pa loke tur e gastonan cu a wordo inverti pa nan yega asina leu y bira profesionalnan riba tereno musical, cultura di canto, baile of den cualkier loke ta concerni nos cultura. Un deseo grandi ta pa e leyman di Aruba ta firme riba e puntonan ey pa pone enfasis riba e parti ey pa asina proteha nos artistanan y proteha nos cultura.

